

馮氏國璋雖由約法取得代理總統然黎氏監視在津元首之尊何以不與天下共戴之段逆尾大不掉肘腋之患何以不與天下共棄之坐視匹夫橫行中原鼎沸苟非政略作用其資格殆難言矣總裁民意所歸國脉所寄以視北庭地位何如聲罪致討斥之爲僞可耳而乃認爲政府四不可也以國際言吾中華民國一年以來實陷于無政府狀態不過使館在北僞庭在北段逆利用舊都資格與外人訂約借款購械我西南又無統一機關可以承認國際條約外人亦遂利用賣國陰謀弋取債權而去今則時異勢殊正式國會行將開議約法具在正宜宣示我民國主權能自承爲交戰國體若認彼爲政府公自命居何等乎五不可也凡茲數議大局必爭名義不容讓人虜廷弗與兩立芻蕘之議願垂察焉此次岑公就職適豫奔走潮汕未及歡迎至爲歉仄事畢返省再聆訓示浙籍衆議員姚桐豫叩馬印

廣州政務總裁唐紹儀等昭告天下電

(銜署)衆議院鑒中華民國七年五月十八日國會非常會議既修正軍政府組織大綱紹儀繼堯廷芳葆懌文榮廷春煊等猥以庸愚被選政務總裁既宣布就職建立軍府謹昭告于天下曰自民國肇基約法斯締由約法產生國會國會者唯一之立法機關也惟

我國憲法既未經正式宣布則所應恪守者唯此約法約法無解散國會之條解散之者即爲非法惟是輩每以國會不良爲藉口不知其中分子容或有不滿人意者然不得因此解散其機關即如國家建官分職不能盡決爲奉公守法然未聞因此咸取消其名義行政且然何況立法願前此艱難恢復之國會何以再蹈解散覆轍則以段祺瑞思假外交政策專制國事遂倒行逆施而不恤也蓋自德人以潛艇封鎖戰略加危害於中立國我國對德問題緣此而起始則警告繼則絕交當段祺瑞將絕交案提出國會時贊成者居四分之三是國會對德意見本與協約國取一致行動及對德宣戰案提出段祺瑞深懼國會窺見其藉外固權之隱衷不待國會議決嗾使黨徒號召無賴圍困國會毆辱議員於是發生六年六月十二日挾迫解散國會之事倪嗣冲首倡叛變之事張勳乘機復辟之事總統被逐元兇恣睢叛人之黨爭冒功首是非淆亂國法蕩然北庭遂得恣所欲爲悍然設非法之參議院通過非法之國會組織及選舉法現又賄賂公行選舉非法之國會議員是今之民國已名存而實亡矣自國會解散以來某等或奔馳滬粵籌議護法或料簡軍實共靖國難海軍將士同具護法決心程前總長首率艦隊南下國會議員亦開非常會議於廣州於中華民國六年八月卅一日公布軍政府組織大綱於是護法大

業始有所寄其時粵桂滇黔川湘六省咸知矢誠衛國羽檄飛傳則三軍感泣義旗所指則群奸褫魄信人心之不死國會之有託也乃者國會已於本年六月十二日在廣州開正式會議議員陸續南下法定人數計日可足而某等適承負託非使國會恢復約法完全回其効力不敢自荒厥職曩者某等念邦基新造靡堪多難屢有和平之提議而所要求又祇恢復國會一事惟北廷深閉固拒絕無誠意即最近庚電聲明如不簽亡國之約我即罷兵和平解決而北廷務爲粉飾之辭絕棄和平之議蓋非法政府爲段祺瑞攘據以來借外債賣物產擅結條約濫購軍械假參加歐戰之名行殘殺國民之實且包買鴉片破壞禁烟條約縱容徐樹錚擅殺陸建章迹其怙惡罔利之行純爲窮兵賊民之計遂致北兵所至城市爲墟湖南長沙株州各屬房屋遭焚燬人民被屠戮尤其明証民心憤慨誓掃兇逆粵桂滇黔川湘六省既早以擁護國會恢復約法爲職志其閩鄂陝豫魯浙贛皖諸省或特起雄師克復州郡或隱謀附義待時而動者咸存見義勇爲之心具滅此朝食之慨以此護法安有不達者哉然國家大政不得已而訴諸武力誠可痛心果北廷悔禍宣布遵守約法恢復國會自可銷除兵氣共維國本凡我國民其鑒茲誠悃一乃心力爲軍府之後盾民國不拔之基實嘉賴之特此通告咸使聞知中華民國軍政府政務

總裁唐紹儀唐繼堯伍廷芳孫文林葆懌陸榮廷岑春煊敬印

唐繼堯告知就職政務總裁特派代表來粵電

吳議長鑒有電敬悉承委總裁本不克當國難方殷焉敢甯息業於皓日電告就職并特派代表趙公樾村藉領明教舒君來當敬歡迎繼堯陽印

雲南趙藩代表唐督軍赴粵占行有日電

非常國會諸公鈞鑒兩院重集薄海嚮風所選總裁悉孚物望西南半壁山立不搖民國前途幸其有豸惟諸公椎輪大輅開闢鴻濛冒犯風濤備嘗險阻遙跂賢勞欽遲在抱藩鐘鳴漏盡豈宜夜行慨念時艱不遑屬處比復承唐莫賡督軍以赴粵代表誣諉迫於公義強起一行現正治裝占行有日明知代大匠斲血指汗顏特愍時危勉將使命晦明風雨懷念瑾音晤教匪遙先此佈候藩寄印

唐繼堯通告已派代表趙樾村赴粵蒞會並舉岑春煊爲政務總裁主席電

(銜畧)吳議長鑒軍政府改組成立總裁諸公亦次第就職西南局勢煥然一新繼堯得附末光實深欣幸惟因親出督師未能分擔職務已派代表趙公樾村赴粵蒞會至政務會議應由各總裁推舉主席一人頃接日公江電藉悉雲老冬日蒞粵旌旗南來允符羣